

1 BEKORINTIO

É Kálara Ósúa Bekorintio

Pablo aa bérán ya Bekorintio

1 ¹Pablo, ntélán á mfá ábo ápostol Kristo Yesus amú nkómánn Nzamá, bía mwadzaŋ Sóstenes, ²bía bérán ya ékóánn bebwíni Nzamá é ne á Korinto; ébá bé ntɔɔ ntélán eki ébe Kristo Yesus, ekígá ná bé bo ntélán eki bábe ébá bésesé bá yónán éyola Ntí wea Yesukristo ébe mevóm mése, Ntí weba ya fe éeweá. ³Mvɔmm ya mína ya é mvwaá Nzamá, é Tará wea, bá Ntí Yesukristo.

Pablo aa vé akíba

⁴Ma vé é Nzamá wɔm akíba tám áse ákála denan amú é mvɔmm Nzamá bé vé yaá mína ébe Kristo Yesus; ⁵ya fe ná ébe dzaŋ ése míní ntɔɔ ndzálánn ébe éñe, ébe éfíá ése ya nyemann ósesé; ⁶amvála ané é ngañiá Kristo a tɔbo yaá ébe mína, ⁷édo é ne ná dás enziŋ dáá dzéŋ mína, míní seŋ fe áléreban Ntí wea Yesukristo; ⁸éñí fe aa ye mína yém nguu akekwiñ asúgánn kaa meku é mos Ntí wea Yesukristo. ⁹É Nzamá bá tɔbo ya ñí mebúnn, éñe a lwée yaá mína ná míní ñɔŋ ngap mínabe é Mwán weñ Yesukristo, Ntí wea.

Mfá mengamm ya mengamm

¹⁰Á bɔbédzaŋ, ma lép mína ya éyola Ntí wea Yesukristo, ná mína bésesé míní tɔbo ya kíŋŋ fɔɔ, ya fe ná nkánán mengamm ó táa bo énzénzaŋ denan, fáve ná tógán tɔbo nlatán ya ósímánn ovɔɔ ya fe nyénánn mbɔɔ. ¹¹Amú ná, á bɔbédzaŋ, é bot Kloé bé kat yaá ma mfá wenan ná, mitée mí ne énzénzaŋ denan. ¹²Ma kóbo ya edí é ne ná, kada mot ye ébe mína aa dzó ná: “Ma me ne é mot Pablo”, “Ma é mot Apolo”, “Ma é mot Pedro”, “Ma é mot Kristo.” ¹³Ye Kristo a ne nkabann? Ye Pablo éñe bá dómle á krús ákála denan? Ye mínaá duuban ki ébe éyola Pablo? ¹⁴Ma vé Nzamá akíba ná meé ndzí du mot enziŋ ye ébe mína, fáve Krispo

bá Gayo; ¹⁵á mfá ye ná mot enziŋ á nza dzó ná mínaá duuban ébe éyola dam. ¹⁶Maá du fe bot béye é ndá Estéfanás; éde ébá bevóó, máá yem ngé maá du mot enziŋ mfé. ¹⁷Amú ná Kristo eé ndzí ma lóm ná me du bot, fáve ná me kat mbamba fwéñ, se ákóbo ya kén, á mfá ye ná me nza bo é krús Kristo nzeze.

Kristo éñe a ne é nguu ya é kén Nzamá

¹⁸Amú ná fwéñ ye á krús e ne é dzam é ne akút á mfá é bot bá dzáŋ, ve mfá wea, ébá bé ne mikoránn, e ne é nguu Nzamá. ¹⁹Amú é ne ntsilann ná:

“Ma ye dzéa é kén bebelé kén,
é fak mifefák da ma ye fe nzaman.”

²⁰Mbelé kén a ne ó vé? Ntsili bekálara a ne ó vé? Nkékéŋŋ nkóbo ye é tám ñí a ne ó vé? Ye ná Nzamá áá bé bo ná kén ye éniŋ dzí é súgan akút? ²¹Dá é tóó ná ébe é kén Nzamá béé ndzí lík ná bé yem Nzamá ya ébe kén ye é sí ñí, ve Nzamá a yén yaá mvéáñ ná á koro bebwíni ébe akút ye á nkatann fwéñ.

²²Édo ná bejudio bá dzaa mendem, begriego bá bá dzéŋ kén; ²³ve bía bía kat fwéñ ná Kristo aá wú á krús, ekɔp obaá á mfá bejudio, akút dzam dá á mfá meyoŋ mefé; ²⁴ve, á mfá é bot a téle yaá, ané bejudio ané begriego, Kristo éñe a ne é nguu Nzamá ya é kén Nzamá. ²⁵Amú ná édí é ne akút ébe Nzamá dá lot bot ya kén, édí dá é ne ateák ébe Nzamá dá dá lot fe bot ya nguu.

²⁶Édo ná, á bobédzaŋ, ñáán tán ná ékígá wenan, abwiññ ye ébe mína é sés ya kén amvála ané éniŋ dá lére; ngé ki biwólo bí bot; ngé ki ébá bá byála á bora méndá mé bot. ²⁷Fáve ná, Nzamá a tóp yaá édí é ne akút éniŋ dzí á mfá álére bebelé kén osoán; a tóp yaá fe édí é ne ateák á mfá álére biwólo bí bot osoán; ²⁸Nzamá a tóp yaá édí dá daŋ ya nzeze béé byana fe do éniŋ, édí dá é sés á mfá átsam édí é né, ²⁹á mfá ye ná mot enziŋ a nza vága ósú Nzamá. ³⁰Ve ákála Déñ, míní ntóó ébe Kristo Yesus, éñe fe a veŋan yaá é kén dea á mfá Nzamá, ya nzósoó, ya ntélán eki ya akoroga; ³¹á mfá ye ná, amvála ané é ne ntsilann ná: “Éñí aa vága, á vággé ébe Ntí.”

É Fwéñ Kristo

2 ¹Á bobédzaŋ, éyoŋ me ngá sian ébe mína, meé kat mína fwéñ é ngañiá [é mam má nzaman kén mot] Nzamá, meé ndzí só ya bora bifíá ngé ki kén mot. ²Amú maá kí k ná máá ye yem dzam enziŋ énzénzaŋ denan, fáve Kristo, éñí a ne ndómlán á krús. ³Éde me mbé énzénzaŋ denan ya áteák, ya wɔŋŋ, ya fe abwiññ beñeñeá; ⁴véa, nkóbo wɔm ya nkatann fwéñ wɔm bíí ndzí bo ya bifíá bí fak ébí kén mot, fáve ya nléránn ye á Nsísim ya nguu, ⁵á mfá ye ná mbwínánn wenan ó nza tobo ébe kén bot, fáve ébe nguu Nzamá.

Nzamá aa lík ná bé yem ní amú Nsísim weñ

⁶Ve bía, bía kóbo édí kén á mfá é bot bé ntóó beñá bot; ve se kén ye é tám ní, ngé ki éñí bidzwée bíye é tám ní, ébí byá ke byá bo kaa eban; ⁷fáve ná bía kóbo ya é kén Nzamá é dzam dá nzaman kén mot, édo é mbé áswenñ, édí Nzamá a ngá tára téle kaa ná é tám ní é bo á mfá é dúmá dea, ⁸éñí betébosú benziñ béye é tám ní báá bé yem; amú ná ngé bé yem do, ngé béé ndzí dómle Ntí ye á dúmá á krús. ⁹Ve amvála ané é ne ntsilann ná:

“É mam dzís deé ndzí yén,
aló deé ndzí wók,
má meé ndzí ki níí á nlém mot,
émó Nzamá a koman yaá á mfá ébá bá dziñ ní.”

¹⁰Ve, Nzamá aá lére bía mó ya Nsísim; amú ná Nsísim aa fas mam mése, atwaa bídwá bí mam Nzamá.

¹¹Éde mot mbé ye énzénzañ bot aa yem é mam mot? Fáve nsísim ó ne ébe mot? Ntéññ mbóó fe mot enziñ ní áá yem ki é mam Nzamá, fáve Nsísim Nzamá. ¹²Ve bía bíí ndzí ñoñ nsísim ye éniñ, fáve ná bía ñoñ nsísim wá só ébe Nzamá, á mfá ye ná bí yem é mam Nzamá a vé yaá bía dás. ¹³Á mfá é mam bía kóbo fe ya mó, se ya bíffá bá yágale ya kén mot, fáve ya ébí Nsísim aa yágale; eé kalan mam méye á nsísim ya nsísim.

¹⁴Ve mot binam áá yébe é mam Nsísim Nzamá, amú ná á mfá weñ mé ne akút, ní a sés ki mó áyem, amú ná bá fas mó ya nsísim. ¹⁵Ve é mot a belé Nsísim aa fas mam mése, ve mot enziñ ní áá fas ki ní. ¹⁶Amú ná: “Nzá aá yem édí Ntí a belé á nló été? Nzá aa ye ní vé ayágalé?” Ve bía, bí belé ósímánn Kristo.

Ábo eséññ fufúlu ya Nzamá

3 ¹Édo ná, á bobédzañ, mée mbé kóbo ya mína amvála ané é bot bé belé nsísim, fáve amvála ané bot béye é sí ní, amvála ané bóññ ébe Kristo. ²Maá núu mína meñáñ, se ñá bídzí; amú ákoan ná míní mbé byo áñoñ, atwaa áwola dí, míní sés ki byo ñoñ, ³amú ná míní ngén mína niñ ané bot béye é sí ní. Ye ná míní belé abéánn ya mitée énzénzañ denan? Nde mínáá niñ ané bot béye é sí ní, míní bo fe mam amvála ané bot béye é sí ní? ⁴Amú ná, é tám mot enziñ aa dzó ná: “Ma me ne éñí Pablo”; éñí mbóó ní ná: “Ma me ne éñí Apolos”. Nde míní sés mot binam?

⁵Éde, Nzá a ne Apolos? Pablo ní a ne ki nzá? Bevwála bíséññ míní bwíni yaá akála ébó, amvála éséññ Ntí a ngá vé kada mot. ⁶Maá beñ, Apolos ní aá swii mendzím; ve Nzamá éñe aá bo ná é vém. ⁷Édo é ne ná, éñí aa beñ a sés dzóm enziñ, ngé ki éñí aa swii mendzím, fáve Nzamá, éñí aa bo ná é vém. ⁸Ve, éñí aa beñ bá éñí aa swii mendzím bé ne dzóm evóó; ve kada mot, aa ye ñoñ é máán meñ amvála ané éséññ deñ

émyen é né. ⁹Amú ná, bía bí ne bebo biséññ Nzamá fufúlu bíabe bó; mína míní ne áfúp ya é ndá Nzamá. ¹⁰Amvála é mvɔmm Nzamá bé vé yaá ma e ne; ma, ané éñí aa lónɔ ya kén, maá bwíi mbókga; éñí mbóó éñe ñí aa lónɔ wó áyóp; ve kada mot ñí á túga daggé amvála avé aa lónɔ áyóp; ¹¹Amú ná mot enziɔ mfé a sés bwíi mbókga ofé, fáve éwí ó bómo yaá, éwó ó ne Yesukristo. ¹²Ve, ngé mot enziɔ aa lónɔ á mbókga te áyóp ya koɔ, ngoós, mékwá mé ne ya eban, bilé, bilwá, mikót bilwá; ¹³éséññ kada mot dá ye yéne; amú ná ó mos wá ye dɔ kúlu éndendaɔ, dá ye fá léreban ya ndúán, éde ndúán ébyen dá ye kyak ámvála éséññ kada mot é né. ¹⁴Ngé melónɔ mot enziɔ a lónɔ yaá áyóp mé tɔbɔ, aa ye ñɔɔ máán. ¹⁵Ngé melónɔ mot enziɔ má ye dzík, aa ye dzímle, ve émyen ñí aa ye tɔbɔ nkoránn, afáɔbɔ amvála ané aa sɔ á ndúán été.

¹⁶Ye mínáá yem ná míní ne é templo Nzamá, ya fe ná Nsísim Nzamá ó tɔɔ ébe mína? ¹⁷Ngé mot enziɔ aa tsam é templo Nzamá, Nzamá ñí aa ye fe ñí tsam; amú ná é templo Nzamá e ne eki, édo dá mína míní né.

¹⁸Mot enziɔ a táa duk émyen; ngé mot enziɔ ye ébe mína aa tém ná a belé kén é tám ñí, á veɔán okúkút mot, á mfá ye ná á veɔán mbelé kén. ¹⁹Amú ná kén ye é sí ñí é ne akút á mfá Nzamá. Amú é ne ntsilann ná: “Éñe a ne éñí aa biñ bebelé kén ébe mékeɔɔ meba bébyen.” ²⁰Ya fe ná, “Ntí aa yem átémɔa bebelé kén, édo dá é ne kaa eban.” ²¹Édo é ne ná, mot enziɔ a táa vága á bot été, amú ná ásesé a ne áawenan. ²²A ne bɔ Pablo, ngé ki Apolos, ngé Pedro, ngé é sí ñí, ngé éniɔ dzí, ngé awú, ngé édí ye é tám ñí, ngé édí é nkún nzu, ásesé a ne áawenan; ²³ve mína ébá Kristo, Kristo ñí éñí Nzamá.

Nzamá éñe a ne nkík misaɔ

4 ¹Édo ná mot áse á ñɔɔɔe bía amvála ané bévwála Kristo ya bébaale béye é mam má nzaman kén mot ébe Nzamá. ²Édo ó véa, bá yana ná bebaale bé koan ya bó ná bé ne é bot bá tɔbɔ ya bó mebúnn. ³Éde, á mfá wɔm é ne ma odzedzam ná mína míní kík ma misaɔ, ngé ki ékóánn enziɔ efé bot bá kík misaɔ; atwaa mámyen ma máá kík ki mámyen misaɔ. ⁴Amú ná, méé belé dzam enziɔ ósímánn wɔm ná dá bwaale ma, se dzam te ki dá tɔɔ ma nzósoó; ve Ntí éñe aa kík ma misaɔ. ⁵Édo é ne ná, míní táa kík nsɔɔ kaa ná tám eé kwíñ, akekwiñ ané Ntí aa ye sɔ, éñe fe aa ye kúlu éyéá é mam mé ne áswéññ ó dzíbi ósí, ya kúlu fe éyéá é mam bot bé mana yaá lám mílém été; véa éñe kada mot aa ye ñɔɔ olugú weñ ébe Nzamá.

⁶Ve, á bɔbédzaɔ, me lére yaá mámyen bía Apolos ané efonann ye é mam má ákála denan, á mfá ye ná míní ñɔɔ ayágalé ébe bía ná míní bɔ kaa ádaɔ áyóp ébe édí é ne ntsilann, á mfá ye ná mot enziɔ ye ébe mína á bɔ kaa ábɔ engúɔ mbóó ébe éñí mbóó. ⁷Amú ná, nzá aa vé wa nzelann? Dzé o belé ná weé ndzí ñɔɔ? Édo ná, ngé waá ñɔɔ dɔ, amú dzé wa bɔ engúɔ amvála ané weé ndzí dɔ ñɔɔ?

⁸Míní dzeñ yaá, míní ntóó fe mikúkúmm, mína míní nga dzwée yaá kaa bía; ngwáa ngé míní nga dzwée yaá fá, á mfá ye ná bía bí dzwée fe fufúlu bíabe mína! ⁹Amú ma tém ná Nzamá a téle yaá bía á mvús, bía baapostol, ané ébá bé kík yaá ná bá ywíñ, bí ntóó fá ané ébá eniñ ngúrá dá yén, ané baáŋgel ané bot. ¹⁰Ébe Kristo, bía bí ne akúkút, ve mína míní ne ya nkée ébe Kristo; bía bí ne mitéteák, ve mína míní ne mingungúú; mína míní ne ya ngaŋŋ, ve bía bí ne kaa ngaŋŋ. ¹¹Anzukwíñ éyɔŋ dí, bía wók nzeñ ya evée, bí ne swésweññ, bá yít bía, bíí belé etɔɔga, ¹²bía dzuk ya biséññ ya é mó mea; éyɔŋ bá tea bía, bía vé abwará; éyɔŋ bá dzéŋ bía ásí, bía bía nzomo do. ¹³Éyɔŋ bá vé bía eyola abé, bía bía dzaa mvwaá; anzukwíñ áwola dí, bí veñan yaá ané mbíán ye éniñ ngúrá, mébukga bot bése.

¹⁴Máá tsili mína é mam má á mfá álére mína osoán, fáve á mfá álép mína ané míndzindziŋŋ mí bwán myám. ¹⁵Amú ná atwaa míní ne fáŋ belé awóm binzuk beyágale ébe Kristo, ve míníí belé abwiññ beéséá, ma fá maá byéñ mína ébe Kristo Yesus ébe nkatann mbamba fwéñ. ¹⁶Édo é ne ná, ma lép mína ná míní nzu ɔ́ ébá bá vú ma.

¹⁷Akála te édo maá lóm mína ya do Timoteo, éñe a ne ndzindziŋŋ mwán wɔm má tɔɔɔ ya ní mebúnn ébe Ntí, éñe aa ye mína síman ménzenn mam ébe Kristo Yesus, amvála ma vé ayágale ébe kada ekóánn bebwíni ébe mevóm mése. ¹⁸Éde bot benziŋ bé nga ɔ́ yaá engúŋ amvála ané ngé máá ye nzu ébe mína. ¹⁹Ve avítsaŋ tám ma ye nzu ébe mína, ngé Ntí aa kómo, véa éñe ma ye yem, se nkóɔ é bot bá ɔ́ engúŋ béte, ve é nguu deba. ²⁰Amú ná édzwée ngómán Nzamá é sés á nkóɔ, fáve á nguu. ²¹Dzé mína kómo? Ye ma yian nzu ébe mína ya nkás, ngé ki edziŋŋ ya evwéwé nlém?

Adzó Nsémm eveák

5 ¹Bébélá, é wók yaá ná énzénzaŋ denan é ne ya nsémm eveák; ámvála nsémm eveák te dá é sés ki atwaa énzénzaŋ bot béye meyɔŋ mefé éte, akekwiñ ná mot enziŋ a belé ngéá éséá. ²Éde mína míní nga dzéñ yaá engúŋ, ye ná mína míní yian tɔɔɔ ya meyep, ná bé tsílán ya é mot a ɔ́ yaá dzam te énzénzaŋ denan? ³Amú ná ngúrá mfá, me tóó kóó ébe mína, ve mfá mbóó ma me tóó nsaŋann osímánn bíabe mína, me kík yaá éñí a ɔ́ yaá dzam te nsaŋ ané me ne. ⁴Ébe éyola Ntí wea Yesus, é tám míní kóán yaá, véa ma me tóó nsaŋann osímánn bíabe mína, ya é nguu Ntí wea Yesus, ⁵keegán Sátan mot te, á mfá ye ná á tsam é núu deñ, ná ngé nsísim weñ wá ó ne tɔɔɔ nkoránn é mos Ntí.

⁶Engúŋ denan é sés mvéáñ. Ye mínáá yem ná oyomm levadura wá vúza ntsura ngúrá? ⁷Vweñján nnomm levadura, á mfá ye ná míní ɔ́ mfefeñ ntsura, amvála ané míní ne do, kaa levadura; amú ná Kristo, é Paskua dzeá, bé kík yaá ní ané metúnŋa. ⁸Édo é ne ná, bí táa dzémle fét

ya nnomm levadura, ngé ki levadura ye á mbéa nlém ya ekúkwát, fáve ná ya mífémm mí ne kaa levadura, émí mí ne bebélá ya fe kaa ayeñɲ.

⁹Ébe é kálara wɔm, maá tsili mína ná míní táa saɲan ya bebo nsémm eveák; ¹⁰meé ndzí dzó ya bebo nsémm eveák béye é sí ñí, ngé ki ébá bé ne oyéá byém, ngé mimvomvóó, ngé bekaɲ biyemá; amú ná ngé néa, é ngá ye yian ná míní kólo é sí ñí. ¹¹Ve éndagá, me tsili yaá mína ná míní táa wulu esaɲann mínabe mot enziɲ ye ébá bá yoban ná mbwíni, véa ñí a tɔɔ mbɔ nsémm eveák, ngé ki é mot a ne oyéá byém, ngé nkaɲ biyemá, ngé nkóbo bot abé, ngé mfían meywa, ngé ki mvomvóó; atwaa bidzí byá míní táa ki dzí fufúlu mínabe amvála mot te. ¹²Éde, amú dzé fá ma kík bot béye átán misaɲ? Nde mínáá kík ébá bé ne mína éte misaɲ? ¹³Ve, Nzamá éñe aa kík ébá béye átán misaɲ. Tsílágán ya ekúkwát mot énzénzaɲ denan éte.

Békík misaɲ bé sés bebwíni

6 ¹É tám mot enziɲ ye ébe mína a belé adzó ya éñí mbɔɔ, ye ná aa nzomo ná aa ke ya dɔ ébe bikúkwát bí bot bí né, alígi áke ébe mítɔɔpán mí bot? ²Ye mínáá yem ná mítɔɔpán mí bot émyɔ myá ye kík eniɲ ngúra misaɲ? Éde, ngé mína mína ye kík eniɲ ngúra misaɲ, ye ná míní sés nkókgán ye ákík ámemámm misaɲ? ³Ye mínáá yem ná bía ye kík baáγγελ misaɲ? Ndagan ná mam méye eniɲ dzí? ⁴Édo ná, ngé míní belé bíkóánn bá kík mam méye eniɲ dzí misaɲ, amú dzé mína téle bekík misaɲ é bot bé sés dzóm ékóánn bebwíni? ⁵Ma dzó dɔ á mfá ósoán wenan. Ye ná mot mbɔɔ enziɲ ye a ne ya kén a sés énzénzaɲ denan éte, ná a ne kík nsaɲ énzénzaɲ bɔbéñaɲ? ⁶Éde, fáve ná mwanñaɲ bá mwanñaɲ bá kíkkgán misaɲ, édí te, dá ósú ébe ébá bé ne kaa ábwíni.

⁷Édo ná, dá é ntɔɔ mína evuzá énzénzaɲ denan ná, míní mbelé nkíkkgán misaɲ énzénzaɲ denan éte. Amú dzé é sés bam bɔ mvéáñ ná bé dzugu mína? Nde é sés bam bɔ mvéáñ ná bé duk mína? ⁸Ve déá, mína bába ya áduk, ádaɲdaɲ ná míní bɔ dɔ bɔbéñɔɲ.

⁹Nde mínáá yem ki ná bikúkwát bí bot bíá ye ñɔɲ tsígá édzwée ngómán Nzamá? Kaa dukgán mína bébyen, amú ná, ané bebo nsémm eveák, ya bekaɲ biyemá, ya bebo medzián, ya bífám bé biningá, ya bífám bá yénán bábe ébá bevɔɔ amvála ané biningá, ¹⁰ya midzídzip, ya ébá bé ne oyéá byém, ya bífían meywa, ya bekóbo bot abé, ya mimvomvóó, báa ye ñɔɲ tsígá édzwée ngómán Nzamá. ¹¹Édo ná néa éñe bot benziɲ béye ébe mína bé mbé; ve bé sop yaá mína, bé tɔɔ yaá mína eki, bé tɔɔ yaá mína benzósoó ébe éyola Ntí Yesukristo ya ébe Nsísim é Nzamá wea.

É templo Mfúfúp Nsísim

¹²Atsiɲɲ dá lére ma ná me ne bɔ mam mése, ve mésesé mé sés ya abúánn; atsiɲɲ dá lére ma ná me ne bɔ mam mése, ve máa ye lík ná

avj3 enziŋ é dzwée ma. ¹³Bidzí bí ne ákála osanŋ, osanŋ wá ákála bidzí; ve Nzamá ní aa ye fá tsam bí beañ bíte. Éd3 ná, níú da e sés ákála ábo nsémm eveák, fáve ákála Ntí, Ntí ní ákála níú. ¹⁴Éde Nzamá, éní a ngá wómo Ntí, aa ye fe bía wómo ákála é ngu deñ.

¹⁵Ye mínáá yem ná méñúu menan mé ne mésúk mé níú Kristo? Ye ma ye ñoŋ mésúk mé níú Kristo, véa me kéñ mo bo mésúk mé níú miningá endendea? É sés ɔɔban amvála enziŋ! ¹⁶Ngé ki ná, ye ná mínáá yem ná éní aa fulan bá endendea miningá, bá ní bé ne níú f33? Amú é ne ntsilann ná: “Bé beañ bá ye bo níú f33.” ¹⁷Ve éní ní aa fulan bá Ntí, bá ní bé ne nsísim mb33.

¹⁸Túpgán nsémm eveák! Nsémm ósesé mot a ne bo, ó ne níú mot átán; ve éní aa bo nsémm eveák, aa bo nsémm ébe é níú deñ émyen. ¹⁹Nde mínáá yem ki ná é níú denan e ne é templo Mfúfúp Nsísim e ne ébe mína, éní míní belé ébe Nzamá, mína míní sés ki fe mína bébyen? ²⁰Amú ná bé kus yaá mína ya táŋ; éde ná váán Nzamá dúmá ébe é níú denan, ya fe ébe mísísim myenan, [émí mí ne émí Nzamá].

Melépgá á mfá alúk

7 ¹Ébe é mam míní ngá tsili ma: é ne mvéañ ná fám eé bo kaa ánama miningá. ²Ve, ákála nsémm eveák, kada fám eé belégé é ngéá weñ émyen, kada miningá ní á belégé fe nnóm weñ émyen. ³Fám eé dzálágé é mvólá a belé ya é ngéá weñ, ntéññ mb33 fe miningá ní á dzálágé ya nnóm. ⁴Miningá éé belé edzwée ébe é níú deñ émyen, fáve ná nnóm; éde nnóm ní éé belé ki edzwée ébe é níú deñ émyen; fáve ná ngéá. ⁵Kaa nímán mína bébyen mb33 ébe éní mb33, fáve ngé míní tára do kwíñ kíŋŋ f33, á mfá ye ávé mína bébyen ébe tám meyaglán, véa míní bera fulan, á mfá ye ná Sátan a nza mína bóble ákála é kaa ndzwéán nlém wenan.

⁶Ve ma dzó do amvála ané melépgá, se ané edí bá mánan. ⁷Amú me ne kómo ná bot bése bé ɔɔbo amvála ané ma; ve kada mot ní a ñoŋ yaá é mvɔmm deñ émyen ébe Nzamá, ngúrá mot ámvála dí, éní mb33 ní ámvála avj3.

⁸Éde, má dzó mikyweñ befám ya mikús mí biningá ná, é ne mvéañ á mfá weba ná ngé bé ne ɔɔbo ané má. ⁹Ve ngé bé sés dzwée bébyen, bé lúkge; amú dá daŋ ya mvéañ ná mot á lúk, ya ná á dzík.

¹⁰Éde, ma mánan ébá bé lúkgan yaá, se ma, fáve ná Ntí; ná miningá a táa kánan bá nnóm; ¹¹ve ngé a kánan bá ní, á ɔɔbo gé kaa áke álúk, ngé ki ná á komje ókaŋŋ bíkwan bá nnóm, fám da e táa ki lama ngéá.

¹²Ve ma dzó ébá bev33 ná, se Ntí: Ngé mwadzaŋ enziŋ a belé ngéá ná ní a sés mbwíni, ngéá te ní eé kómo ɔɔbo bá ní, mot te a táa ní lama. ¹³Éde, ngé miningá enziŋ ní a belé nnóm ná ní a sés mbwíni, nnóm te ní eé kómo ɔɔbo bá ní, miningá te a táa lama nnóm. ¹⁴Amú ná, nnóm a ne kaa ábwíni a ɔɔbo yaá eki ébe ngéá, ngéá ní a ne kaa ki ábwíni ní a ɔɔbo

yaá eki ébe mwadzan; ngé kaa néa, é bwán benan bá ye bɔ nzeze bot; ve áwola dí bá bé ntɔ́ ntélán eki. ¹⁵Ve, ngé é mot a sés mbwíni aa kánan, á kánañan; ébe memvála mé mam méte, mwadzan ngé ki kéá dzea aa lígi filí, ve Nzamá a lwée yaá mína ná míní niñ á mvwaá été. ¹⁶Á miningá, wa yem fá á yá nde tám enziñ wa ye koro ñu nnóm? Á fám, wa wa yem ki á yá nde tám enziñ wa ye koro ñu ngéá?

¹⁷Ve amvála te fe, ma mánan bíkóánn bebwíni bíse, ná kada mot á wulugé amvála ané Ntí a téle yaá ñí, ya amvála ané Nzamá a lwée yaá fe ñí. ¹⁸Ye bá lwée mot enziñ a tɔ́ nkíkǵán akeé? Á tɔ́bɔgé nkíkǵán akeé. Ye bá lwée mot enziñ a koan ná a sés nkíkǵán akeé? A táa kíkban akeé. ¹⁹Nkíkǵán akeé ó sés dzóm enziñ, kaa nkíkǵán akeé ñí a sés ki dzóm enziñ, fáve ná á baale memvéna mé Nzamá. ²⁰Kada mot á tɔ́bɔgé amvála á mbé é tám bé ngá lwée ñí. ²¹Ye bá lwée wa o tɔ́ oloá? O táa kele nlém ó yóp; afáñbɔ ná ngé o ne tɔ́bɔ filí, belagán ya dɔ mvéáñ. ²²Amú ná é mot Ntí aá lwée a tɔ́ oloá, a ne filí mot ébe Ntí; amvála te fe é mot bá lwée a tɔ́ filí mot, a ne óloá Kristo. ²³Bá kus mína ya tán; míní táa bɔ áloá bot. ²⁴Édo ná, á bɔbédzan, kada mot á tɔ́bɔgé ébe Nzamá ámvála á mbé é tám bé ngá lwée ñí.

Pablo aa vé melépgá á mfá métám má súgan

²⁵Á mfá mikyweñ mí biningá mée belé é mvéná Ntí enziñ, ve ma lére ané me téa, amvála ané éñí a koan yaá ya nyénánn engóngɔ́ó ébe Ntí á mfá ábɔ é mot bá tɔ́bɔ ya ñí mebúnn. ²⁶Éde, ma tém ná é ne mvéáñ ná mot á tɔ́bɔ ámvála a ne, dzam te dá dá yéne fe mvéáñ ébe midzuúk míye é tám ñí. ²⁷Ngé o tsií ya ngéá, o táa dzéñ ná o nkánán ya ñí. Ngé weé belé ngéá, o táa dzéñ miningá. ²⁸Ve, ngé wa lúk ki, weé ndzí bɔ nsémm; ngé nkyweñ miningá wá ke álúk, wá weé ndzí ki bɔ nsémm; ve bá ye yén midzuúk éniñ dzí, ma ma kómo mína myo ávéé.

²⁹Ve, á bɔbédzan, dá yíli ná tám eé ntɔ́ etun; édo é ne ná, atée ye áwola dí ye áke ósú, ébá bé belé beyéá, bé tɔ́bɔgé amvála ané ngé bée belé bɔ; ³⁰ébá bá ke bá yi, amvála ané ngé báá yi ki; ébá bá ke bá sán, amvála ané ngé báá sán ki; ébá bá ke bá kus, amvála ané ngé bée belé ki dzóm enziñ; ³¹ébá bá bá ke bá ñɔ́ñ abúánn éniñ dzí, bá amvála ané ngé báá túga ki ñɔ́ñ abúánn, amú ná efonann ye éniñ dzí dá ke dá mana.

³²Ve, ma ma kómo ná míní tɔ́bɔ filí ébe é mam bot bá dzéñ. Nkyweñ fám wá kee émyen ébe é mam Ntí, ámvála a ne vé nlém Ntí mesán; ³³ve, éñí ñí a belé ngéá, aa kee émyen ébe é mam méye éniñ dzí, ámvála a ne vé nlém ngéá mesán, ³⁴amvála te édo a ne nkabann ónzáññ. Ntéññ mbɔ́ó fe, é miningá ñí a sés álúk ngé ki éñí a ne endúnn ngwan, aa kee émyen ébe é mam Ntí, á mfá ye ná á tɔ́bɔ eki ané ó ñúu mison ané á nsísim; ve, é miningá a ne álúk ñí aa kee émyen ébe mam méye éniñ dzí, ámvála a ne vé nlém nnóm mesán.

³⁵Éde, ma dzó dzam te á mfá ábúánn denan, se á mfá ye ná ma vé mína miyeñ, fáve á mfá édí é ne nzósoó ya á mfá áyémele mbóann mbán éséññ Ntí ya nlém ósesé.

³⁶Ve, ngé mot enziñ aa tém ná áá bɔ édí é ne tételé á mfá ngwan dzeñ, ngé dá é bem yaá áku evom, é kénj álúk ngé édo dá yian ná bé bɔ, á bɔ́oge édí aa kómo; áá bɔ nsémm. ³⁷Ve éñí a yém nguu á nlém weñ été, kaa ki ané bá tsíni ñí dzam enziñ; eé edzwée fe nlém weñ, ñí a kík yaá fe á nlém weñ été ná, aa baale ngwan dzeñ endúnn, aa bɔ mvéáñ. ³⁸Édo é ne ná, é mot aa kee endúnn ngwan dzeñ álúk, a bɔ mvéáñ; ve, éñí ñí a bɔ kaa ñí ákee álúk, aa bɔ édí dá dan ya mvéáñ.

³⁹Minigá a tsíí é tám nnóm a ngén a téa; ve ngé nnóm a wú yaá, a ntɔ́o filí á mfá álúk é mot émyen aa kómo, fáve ngé é mot te a ne ébe Ntí. ⁴⁰Ve me téa ná, aa ye dan tɔbɔ ya abwará ámvála á ntɔ́o; ma ma tém fe ná me belé Nsísim Nzamá.

Bidzí bá vé biyemá ané metúnɲa

8 ¹Éde á mfá bidzí bá vé biyemá ané metúnɲa, bía yem ná bía bésesé bí belé nyemann. Nyemann wá vé engúnj, ve edziñj dá dá yém mot. ²Ngé mot enziñ aa tém ná a yem yaá dzam enziñ, ñí áá bé yem ámvála aa yian dɔ yem. ³Ve ngé mot enziñ aa dziñ Nzamá, Nzamá a yem yaá ñí.

⁴Édo ná, á mfá ádzí bidzí bá vé biyemá ané metúnɲa, bía yem ná eyemá é sés dzóm enziñ é sí ñí, ya fe ná Nzamá mfé a sés, fáve mbɔ́ɔ. ⁵A ne fánj bɔ bevɔ́ɔ benziñ bá lwée bɔ ná benzamá, ané á dzóp été, ané é sí ñí; ámvála é ne ná, benzamá bé ne abwiññ ya fe abwiññ betí. ⁶Ve á mfá wea, Nzamá a ne mbɔ́ɔ, Éséá ébe émyen, éñe byém bíse byá sɔ, bía bí ne fe ákála deñ; Ntí a ne mbɔ́ɔ, éñe a ne Yesukristo, amú éñe byém bíse bí ne, bía bí ne fe ákála deñ.

Édziñj bɔbéñafwáa

⁷Ve nyemann te ó sés ébe mot áse; dá é tɔ́ɔ ná, ya anzukwíñ éndagá, bot benziñ bé ngén bé belé fúlú ye ákañ bíyemá, bá dzí bidzí amvála ané ngé bí ne bídzí bá vé eyemá ané metúnɲa; véa ósímánn ye á nlém weba wá ó tɔ́ɔ ateák, éde wá ñɔɲ ayeñj. ⁸Ve bidzí byá byáa ye bɔ ná Nzamá á yébe bía; ngé bíá dzí, bíá dzímle dzóm; ngé bía dzí ki, bíá wún ki dzóm. ⁹Ve tɔbɔgán ya nkée ná, é filí denan é táa nzu bɔ ekɔp obaá á mfá mitéteák. ¹⁰Amú ná, wa é mot o belé nyemann, ngé mot enziñ a yén wa o tɔ́ɔ ó téble é templo biyemá, nde ósímánn ye á nlém ntéteák mot te wáa ye ñí sógle ná á dzí bidzí bé vé yaá biyemá ané metúnɲa? ¹¹Amú ná ébe nyemann we, é mwanñɔɲ Kristo a ngá wú ákála deñ, éñí a ne ntéteák ñí á ɲga dzán yaá. ¹²Ya dzam te, é tám mína bɔ nsémm néa ébe bɔbéñɔɲ, míní dzugu ntéteák ásimánn ye á mílém deba, mína bɔ fe nsémm ébe Kristo. ¹³Édo é ne ná, ngé bidzí byá bɔ mwadzanj ná á kɔp obaá, máa ye fe dzí tsít tám enziñ, á mfá ye ná me nza bɔ mwadzanj ná á kɔp obaá.

É filí ápostol

9 ¹Ye ná me sés filí? Ye ná me sés apostol? Ye ná mǎá yén yaá Yesus Ntí wea? Nde se mína míní ne éséññ dam ébe Ntí? ²Ngé á mfá bot befé me sés apostol, ve bébélá á mfá wenan mé ne ní; amú ná mína míní ne é sitám ye éséññ apostol dam ébe Ntí.

³Éyalann dam ébe é bot bá kík ma misan, édo dí ná: ⁴Nde bí sés filí ye ádzí ya áñú? ⁵Nde bí sés filí ye álúk kéá dzea enziñ bí kéñ fe ya ní, amvála ané é baapostol bevóó, ya fe Ntí bobéñan, ya fe Pedro? ⁶Ye ná fáve ma bía Bernabé bía bíá yian átoó kaa ábo eséññ? ⁷Nzá á nga bo yaá eséññ benzima, émyen á nga yáán fe ya émyen? Nzá aa beñ afúp midzík mí vino, ní kaa ádzí ebumá ye éte? Ngé ki ná, nzá aa baale mbamm mitómá éñe kaa áñú meñán méye mbamm te? ⁸Ye ná ma dzó do ya ósimánn mot binam, ngé ki ná nde atsiniñ ébyen dá dáá dzó fe do? ⁹Amú é ntóó ntsilann á nkóó métsiniñ Moisés ná: “O táa dzip dzóm ánu é ñát dá kwa bidzí.” Ye ná nlém Nzamá ó kele ó yóp ákála beñát? ¹⁰Nde áá dzó do ákála dea? Amú ná dá tsiliban ákála dea, ná é mot aa bwíñ sí á mfá ábeñ, aa yian do bwíñ ya oyan; é mot ní aa kwa bidzí, ní aa yian fe kwa bidzí ya oyan ye ná aa ye belé ngap. ¹¹Ngé bía beñ ébe mína mam méye á Nsísim, ye dá ye bo bora dzam enziñ ngé bía yoo byém bíye éniñ dzí ébe mína? ¹²Ngé bot befé bé belé ná bá yian ya do ébe mína, nde se bía bía dan yian ya do? Ve bía bíí ndzí belan ya do, fáve ná bí ngá nzomo ásesé, á mfá ye ná é nza bo é mbamba fwéñ Kristo ekóp obaá.

¹³Ye mínáá yem ná ébá bé ne ntélán á mfá ábo bíséññ á Templo, bá dzí bidzí bíye á Templo; ébá bá bá bo eséññ áltar, ébe áltar bá ñon é ngap deba? ¹⁴Amvála te fe édo Ntí ní a téle yaá ná, ébá bá kat mbamba fwéñ, bé niñ fe ébe mbamba fwéñ. ¹⁵Ve, mam méte ma mǎá bé búán ya mo. Mǎá tsili ki do á mfá ye ná néa éñe míní belan ya ma, amú é ne ma mvéáñ ná meé wú ye ná mot enziñ á dzip ma engúnj te.

¹⁶Akála ná ngé ma kat mbamba fwéñ, meé belé dzam enziñ ye me ne bo ya do engúnj; amú édo é ne fe ma ntsinann ná ma yian bo; éde ngwáa fá ya ma, ngé ma bo kaa ákat mbamba fwéñ! ¹⁷Amú ná ngé ma bo do ya nkómánn wóm mámyen, me belé máán; ve ngé ma bo do ákála ntsinann, ma bo éséññ bébélá mbaale bé téle yaá ma. ¹⁸Éde véa, dzé é ne é máán mam? Ná éyonj ma kat mbamba fwéñ, meé bo do á dás, kaa ábelan ya é mam má yian ya ma ané nkat mbamba fwéñ.

Áyem nguu á mfá áñonj máán

¹⁹Amú afánbo ná me ne filí á mfá bot bése, ma me ntóó oloá á mfá bot bése, á mfá ye ná me wún abwiññ bebwíni. ²⁰Á mfá bejudio, me bo yaá ané mwann judio, á mfá ye ná ngé me ne wún bejudio; á mfá ébá bé ne átsiniñ así, amvála ané éñí a ne átsiniñ así [afánbo ná ma me sés átsiniñ

ásí], á mfá ye ná ngé me ne wún ébá bé ne átsiŋŋ ásí. ²¹Á mfá ébá bá niŋ kaa átsiŋŋ, amvála ané átsiŋŋ é sés. Dǎá yíli ná me ne filí ébe átsiŋŋ Nzamá, dá e tǒǒ ná me ne átsiŋŋ Kristo ásí; á mfá ye ná ngé me ne wún ébá bá niŋ kaa átsiŋŋ. ²²Á mfá mitéteák maá bǒ ntéteák, á mfá ye ná ngé me ne wún mitéteák; éde maá bǒ ásesé á mfá bot bése, á mfá ye ná ébe menzenn memvála mése ngé me ne koro bevǒǒ benziŋ. ²³Éde, ma bǒ dzam ése akála mbamba fwéñ; á mfá ye ná me ñǒŋ ñí ngap.

²⁴Nde mínǎá yem ná ébá bá katan ya mbíí, ngúrá mfá, bésesé bá mára, ve mfá mbǒǒ, fáve mot mbǒǒ éñe aa ñǒŋ dás? Édo ná máragán, á mfá ye ná míní wún. ²⁵É mot áse aa ke nkat, aa dzwée émyen ébe mam mése; ngúrá mfá, bá bǒ dǒ ná bé ñǒŋ é korona dá bweñ, ve mfá mbǒǒ, bía ébe éñí é ne kaa ábweñ. ²⁶Édo é ne ná, amvála te édo ma mára, se ané éñí aa mára tugá; amvála te fe édo ma yítan, se ané éñí aa wea mibim á nyem; ²⁷fáve ná, ma vé é ñúu dam akira, meé bǒ dǒ óloá wǒm; á nza bǒ ná, me tǒǒ nkat fwéñ bot befé, ve, ngé mámyen ma me ne tǒbǒ kaa ákyaba.

Melépgá mfá nkaŋann biyemá

10 ¹Á bǒbédzan, máǎ kómo ná míní tǒbǒ kaa áyem ná, betará bése bá tǒbǒ á nkút ásí, bésesé bá lot fe á máŋ été; ²éde, ébe Moisés bésesé bá mana duuban á nkút été ya fe á máŋ été. ³Ané bésesé bé ngá dzí bidzí bivǒǒ ya bivǒǒ býe á nsísim, ⁴bésesé baá ñú fe meñú mevǒǒ ya mevǒǒ méye á nsísim; amú ná, bé ngá ñú ébe ákwá ye á nsísim é ngá bee bǒ, éde akwá te é mbé Kristo. ⁵Ve, ébá bé ngá bǒ kaa ávé Nzamá nlém mesán ébǒ bé ngá dan ya abwiññ été, ané bé ngá lígi bé dzebe mévóm ya mévóm éyáŋŋ été.

⁶Mam méte mé ngá bǒban ná mé bǒ bía efonann, ná bí táa ñamle bembéa bé mam, amvála ané bé ngá ñamle. ⁷Míní táa bǒ bekaŋ biyemá, amvála ané bevǒǒ benziŋ býe ébe bǒ; amvála ané é ne ntsilann ná: “Bot bé ngá tǒbǒ ósí, ná bá dzí ya áñú, véa bé tébe ná bá dzém tugá.”

⁸Bí táa ki bǒ nsémm eveák amvála ané bevǒǒ benziŋ býe ébe bǒ bé ngá bǒ nsémm eveák, éde bé ngá wú mos mbǒǒ bot táŋ binzuk mewóm mé beañ ya binzuk bí léa (23,000). ⁹Bí táa ki bóble Kristo, amvála ané bevǒǒ benziŋ býe ébe bǒ bé ngá bóble ñí, éde bé ngá wú akála beñó. ¹⁰Bí táa ki kǒbǒ ya Nzamá miswa, amvála ané bevǒǒ benziŋ býe ébe bǒ bé ngá kǒbǒ miswa, éde nywíññ bot a ngá dzéa bǒ.

¹¹Mam méte mé ngá bǒban ébe bǒ ané efonann, éde mé ngá tǒbǒ ntsilann amvála ané melépgá á mfá wea, bía, ébá asúgánn ye métám é sian yaá ébe bǒ. ¹²Édo é ne ná, éñí aa tém ná a yém á tǒbǒgé ya nkée, ná a nza ku. ¹³Nkat enziŋ wǎá bé sian ébe mína ná ó sés éwí mot áse; ve é Nzamá a ne éñí bá tǒbǒ ya ñí mebúnn áá ye lík ná míní tǒbǒ á nkat été álot ábímm míní sés nzomo, fáve ná ya nkat te aa ye fe vé ámvála bé ne wǒ kólo été, á mfá ye ná míní ne wǒ ánzomo.

¹⁴Ya amú ddam te, á mindzindziñ myám, túpgán nkanann biyemá.
¹⁵Ma kóbo ya mína amvála ané mifefák mí bot: Kíkgán nsañ ébe édí ma dzó. ¹⁶É kóp abwará éñí bía vé abwará ya do, nde se édo bía ñoñ ya do ngap ébe mékií Kristo? Mfém m bía bák, nde se éwo bía ñoñ ya wó ngap ébe é ñúu Kristo? ¹⁷Dá é tóó ná mfém m ó ne ovóó, ve bía, bí fáj bo abwiññ, bí ne ñúu fóó; amú ná bía bése sé bía bía ñoñ fe ngap ébe mfém m ovóó te.

¹⁸Dággán áyoñ Israel ye é sí ñí: ébá bá dzí metúnña, nde báá ñoñ ngap áltar? ¹⁹Éde, nzá ddam ma kómo dzó ya do? Ye ná bidzí bá vé biyemá ané metúnña bí ne dzóm enziñ, ye ná eyemá dá é ne ki dzóm enziñ? ²⁰Fáve ná, é byém meyoñ mefé má vé ané metúnña, bá vé do bembéa misísím, se Nzamá; ma máá kómo ná míní ñoñ ngap mínabe bembéa misísím. ²¹Míní sés ñú é kóp Ntí ya fe é kóp bembéa misísím; míní sés ñoñ ngap ébe é téble Ntí ya fe ébe é téble bembéa misísím. ²²Ye ná bía ye soñ Ntí ya abéánn? Ye ná bía dan ki ñí ya nguu?

Bógán ddam ése ná míní vé Nzamá dúmá

²³É ne filí ná bé bo ddam ése, ve ddam ése é sés ya abúánn; é ne filí ná bé bo ddam ése, ve ddam ése dáá vé mot nguu. ²⁴Mot enziñ a táa dzéñ é mvéáñ dzeñ émyen, fáve éñí é mot mbóó.

²⁵É dzóm ése bá kuan á mákít, dzáán do kaa ásíli ddam enziñ, ákála ósímánn ye á nlém. ²⁶Amú ná, Ntí éñe a ne ya sí ngúra ya fe é dzóm ése é ne été.

²⁷Ngé mot enziñ ye á sés mbwíni a bána mína, mína míní yébe fe ná mína ke, dzáán é dzóm ése bá téle mína ósú, kaa ásíli ddam enziñ, ákála ósímánn ye á nlém. ²⁸Ve ngé mot enziñ aa dzó mína ná: “Bé vé yaá biyemá é dzóm dí ané metúnña;” míní táa fe dzí, ákála é mot á dzó mína do, ya ákála ósímánn ye á nlém; amú ná, Ntí éñe a ne ya sí ngúra ya fe é dzóm ése é ne été.

²⁹Ma dzó ná, se ósímánn we, fáve éwí é mot mbóó. Éde, amú dzé fá bá ye kík étóó filí dam misañ ya éyá ósímánn ye á nlém? ³⁰Ngé ma ñoñ é ngap dam meé vé akíba, amú dzé bé ne ma kóbo abé ébe édí ma vé akíba?

³¹Édo é ne ná, ané mína dzí, ngé áñú, ngé ki ddam enziñ afé mína bo, bógán do ásesé á mfá é dúmá Nzamá. ³²Míní táa bo é dzóm dá kóp mot obaá ané bejudio, ané begriego, ngé ki ékóánn bebwíni Nzamá. ³³Amvála te fe ma ma dzéñ ná bot bése bé ñoñ mesán á nlém ébe ddam ése, kaa ádzéñ abúánn dam mámyen, fáve édí abwiññ bot, á mfá ye ná ngé bé ne tobo nkoránn.

11

¹Beegán éfonann dam, amvála ané ma ma bee édí Kristo.

Bebwíni bá kóán

²Ma sák mína, ná ébe ddam ése mína síman ma, mína baale fe meyágalé tételé ámvála me ngá lére mína mo. ³Ve, ma kómo ná míní yem

na Kristo éñe a ne nló fám óse, nló miningá éwɔ wá ó ne fám, nló Kristo éwɔ wá ó ne Nzamá.

⁴É fám ése da búru nló éyɔɔ aa yaglan, ngé ki éyɔɔ aa kúlu medzó, da vé nló weñ osoán. ⁵Ve, é miningá áse ñí aa bɔ kaa ábúru nló, éyɔɔ aa yaglan, ngé ki éyɔɔ aa kúlu medzó, aa vé nló weñ osoán; amú ná a ne ntéññ mbɔɔ amvála ané éñí nló ó ne ntwíññ. ⁶Amú ná, ngé miningá áá búru nló, á kíkge esií; ve ngé é ne miningá osoán ná aa kík esií, ngé ki ná á kenban ntwíññ, á búrugé nló.

⁷Ngúra mfá, fám dáá yian búru nló, akála ná édo e ne éfonann ya é dúmá Nzamá; ve mfá mbɔɔ miningá éñe ñí a ne é dúmá fám. ⁸Amú ná fám dáá sɔ ébe miningá, fáve ná miningá éñe aa sɔ ébe fám; ⁹ngé ki ná béé ndzí vele fám akála miningá, fáve ná miningá éñe baá vele akála fám. ¹⁰Akála te édo miningá aa yian belé ndem nguú edzwée á nló áyóp, akála baángel.

¹¹Ve deá ébe Ntí, miningá a sés kaa fám, fám da e sés ki kaa miningá. ¹²Amú ámvála é ne ná miningá aa sɔ ébe fám, amvála te fe édo fám da da sɔ ébe miningá, ve byém bíse byá byá sɔ ébe Nzamá.

¹³Mína bébyen kíkɔán nsan; Ye dá yian ná miningá á yaglan ya Nzamá kaa ábúru nló? ¹⁴Nde ntélán mam óbyen wáá yágale mína ná, ngé fám da yála esií, é ne dzam mvyan á mfá weñ. ¹⁵Ve ngé miningá ñí a belé eyála esií, dá é ne ñí dúmá. Amú ná bé vé yaá ñí esií éyian ebúrua. ¹⁶Ve ngé mot enziɔ aa kómo bɔ mbɔ bisó, bía bíí belé amvála fúlú te, ngé ki bíkóánn bebwíni Nzamá.

Nkánán Mengamm éyɔɔ bá kóán á mfá ádzí bidzí Ntí

¹⁷Éde, éyɔɔ ma mánan mína é mam má, máá sák mína; amú ná ékóánn denan é sés á mfá ye edí dá dan ya mvéáñ, fáve á mfá ye edí é ne mbéa dzam. ¹⁸Édí ósúá, ma wók fá bá kóbo ná, éyɔɔ mína kóán ané ékóánn bebwíni, mikánán mí ne énzénzan denan été; éde ná ngúra mfá, ma bwíni do. ¹⁹Amú dá yian ná mengamm ya mengamm á nyébé mé bɔ énzénzan denan été, á mfá ye ná ébá Nzamá aa kyaba bé léreban énzénzan denan. ²⁰Édo é ne ná, éyɔɔ mína kóán, edí te é sés á mfá ádzí bídzí Ntí; ²¹amú ná éyɔɔ mína dzí, kada mot aa tára twáa bídzí byeñ émyen, éde ná ngúra mot weé lígi wá wók nzeñ, éñí mbɔɔ ñí á nga fian. ²²Éde á yá? Nde míníí belé mendá á mfá ádzí ya áñú? Ngé ki ná, ye ékóánn bebwíni Nzamá édo mína byana ya álére fe é bot bé ne kaa dzóm osoán? Ma ye mína dzó á yá? Ye ná ma ye mína sák? Ébe edí te, máá ye mína sák.

²³Amú ná maá ñɔɔ ébe Ntí edí me yágale yaá fe mína ná, álú bé ngá kuan Ntí Yesus, áá ñɔɔ mfém, ²⁴niané a ngá mana vé akíba, éde a ngá bák wó eé dzó ná: “É ñúu dam é ne á mfá wenan, édo ñí; bɔgán é dzam dí á mfá ásimánn ma.” ²⁵Éde niané bé ngá mana dzí, amvála te fe avóó ya avóó a ngá ñɔɔ kóp, eé dzó

ná: “É kóp ñí édo e ne mfefeñ elat ébe mekií mam; bíyɔɔ bíse mína ñú do, boɔán do á mfá ásimánn ma.” ²⁶Amú ná bíyɔɔ bíse míní ne dzí mfémm wí ye áñú é kóp ñí, áwú Ntí édo mína kat fwéñ akekwiñ é tám aa ye sɔ.

Ádzí bídzí Ntí ámvála é ne kaa áyian

²⁷Édo é ne ná, éñí aa dzí mfémm ngé ki ná aa ñú é kóp Ntí ámvála é ne kaa áyian, aa ye ñɔɔ meku ébe é ñúu ya mékií Ntí. ²⁸Éde, kada mot á tárágé fas émyen, véa, á dzá mfémm, á ñá fe kóp. ²⁹Amú ná éñí aa dzí ye áñú, kaa átára ñú tán ná é ñúu Ntí édo ñí, mot te aa dzí ye áñú méku meñ émyen. ³⁰Ya akála dzam te édo énzénzanɔ denan éte é ne ya abwiññ mítéteák ya mikúkwann, abwiññ dá é ntɔɔ fe óyó [nwúán].

³¹Ve, ngé bí tára kí k bía bébyen nsan, véa báa ye fe bía kí k misan. ³²Ve éyɔɔ bá kí k bía misan, Ntí aa vé bía akira, á mfá ye ná bí nza ñɔɔ meku nsámá mbɔɔ ya éniɔ dzí.

³³Édo ná, á bobédzanɔ, é tám mína kóán ná mína dzí, áyananán bevɔɔ ya ébá bevɔɔ. ³⁴Ngé mot enziɔ aa wók nzeñ, á dzá é ndá dzeñ, ná míní nza kóán á mfá nkíkɔán misanɔ.

Éde, é mam mése mevɔɔ ma ye mɔ kom éyɔɔ ma ye sɔ.

Mvɔmm ye á Nsísim

12 ¹Á bobédzanɔ, mãá kómo ná míní tɔɔ kaa áyem á mfá é mam má sɔ ébe Nsísim.

²Mína yem ná é tám míní mbé bot béye meyɔɔ mefé, memvála mése bé ngá bo béé ke bá dulu mína ébe mivúm vúk biyemá. ³Ya dzam te édo, ma bo ná míní yem ná mot enziɔ ye aa kɔbo akála Nsísim Nzamá áá dzó ná: “Yesus a ne ya biboɔ,” mot enziɔ a sés ki dzó ná: “Yesus éñe a ne Ntí,” ngé é sés akála Mfúfúp Nsísim.

⁴Éde, mvɔmm é ne mendzanɔ ya mendzanɔ, ve Nsísim émyen éñe a ne mbɔɔ; ⁵mesúk mé éséññ Nzamá má mé ne fe mendzanɔ ya mendzanɔ, ve Ntí émyen éñe a ne mbɔɔ; ⁶ámvála mibɔann bíséññ myá mí ne fe mendzanɔ ya mendzanɔ, ve Nzamá éñí aa bo mam mése ébe bot bése Émyen a ne mbɔɔ. ⁷Ve, nléránn ye á Nsísim bá vé wó ébe kada mot á mfá é dzam é ne ya abúánn. ⁸Éde fá ngúra mot akála Nsísim, bá vé ñí efíá kén, éñí mbɔɔ ñí ya efíá nyemann akála Nsísim mbɔɔ ya mbɔɔ. ⁹Éñí mbɔɔ, ñí ya mbwínánn akála Nsísim mbɔɔ ya mbɔɔ; éñí mbɔɔ, ñí ya mvɔmm ye áséñ bot akála Nsísim mbɔɔ ya mbɔɔ; ¹⁰éñí mbɔɔ, ñí ya ábo biyágán bí mam; éñí mbɔɔ, ñí ya nkúlánn medzó; éñí mbɔɔ, ñí ya áyem ábíli misísim; éñí mbɔɔ, ñí ya ákɔbo biyágán míkɔbo; éñí mbɔɔ, ñí ya ákelan biyágán míkɔbo. ¹¹Ve mam méte mése Nsísim Émyen aa bo mɔ a ne mbɔɔ ya mbɔɔ, eé kap ébe kada mot amvála ané Émyen aa kómo.

Ñúu fɔɔ

¹²Amú ná amvála ané ñúu e ne fɔɔ, da e belé abwiññ mesúk, ve mesúk mése méye ó ñúu, mé fáɔ bo abwiññ, mé ne ñúu fɔɔ, amvála te fe Kristo

ñí a ne; ¹³amú ná ébe Nsísim mbóó, bía bésesé bía tɔɔɔ nduubán ébe ñúu fúú, ané bejudio ngé ki begriego; ané aloá ngé ki ébá bé ne filí, éde bésesé bá vé bó ná bé ñú ébe Nsísim mbóó.

¹⁴Amú ná ñúu e sés asúk avóó, fáve ná abwiññ mesúk. ¹⁵Éde ngé abo é dzó ná: “Akála ná me sés wéá, éde me sés fe ngap ye ó ñúu”, ye dzam te édo áá ye bo kaa ábo ya do ngap ye ó ñúu? ¹⁶Ngé aló dá é dzó ki ná: “Akála ná me sés dzís, éde me sés fe ngap ye ó ñúu”, ye dzam te édo áá ye bo kaa ábo ya do ngap ye ó ñúu? ¹⁷Ngé ñúu ngúra eé bo dzís; éde áwók mam, é ngá ye bo ó vé? Ngé ñúu ngúra eé bo aló; éde áwók binum, dá é ngá ye bo ó vé? ¹⁸Ve éndagá, Nzamá ñí a téle yaá mesúk mé ñúu, kada asúk, amvála ané a ngá kómo do. ¹⁹Ve, ngé ásesé a bo fáve asúk avóó, ñúu e ngá ye bo ó vé? ²⁰Édo é ne ná, abwiññ mesúk mé ñúu, ve ñúu e ne fúú.

²¹Éde dzís é sés dzó wéá ná: “Ó sés ma ya eban”; nló wá ó sés ki dzó mebo ná: “Míní sés ma ya eban.” ²²Ve ádanɔan ná, mesúk mé ñúu má lére ané émo má dan mitéteák, émo mé ne éma má dan ya eban; ²³mesúk mé ñúu bía tém ná bía dan kám ya mo, émo bía bía dan bwára ya ngaɔɔ; akekwiñ ná éma bía dan swala, émo bá bwára ededea mvéáñ. ²⁴Ve, mesúk mé ñúu má yéne má máá yi do. Ve fáve ná éñe Nzamá aá téle ñúu néa, eé bíra vé abwiññ ngaɔɔ ébe mesúk mé ñúu mée mbé mé belé do, ²⁵ná nkánán mengamm ó nzá bo ó ñúu, fáve ná mesúk mé ñúu mébyen mé káran mevóó ya éma mevóó. ²⁶Éde, ngé asúk ñúu enziɔ dá dzuk, mesúk mé ñúu mése má má dzuk fe ya édí te; ngé asúk ñúu enziɔ dá ñɔɔ ki ngaɔɔ, mesúk mé ñúu mése má má sán fe ya édí te.

²⁷Éde mína, míní ne é ñúu Kristo, kada mot asúk ñúu deñ. ²⁸Éde ékóánn bebwíni été, Nzamá a téle yaá, ósúsúa baapostol; é belan, bekúlu medzó; é belan léa, beyágale; véa, ébá bá bo é mam mé ne nguu; véa, mvɔmm ye áseñ bot; émí míye ávwála bot, émí míye ábo ntébosú, ya fe mendzan míkóbo. ²⁹Ye bésesé bé ne baapostol? Ye bésesé bé ne bekúlu medzó? Ye bésesé bé ne beyágale? Ye bésesé bá bo é mam mé ne nguu? ³⁰Ye bésesé bé belé mvɔmm ye áseñ bot? Ye bésesé bá kóbo mendzan míkóbo? Ye bésesé bá kelan?

Edziɔɔ

³¹Ábíran áñamle é mvɔmm dá dan ya mvéáñ. Ve éndagá, ma ma lére mína é nzenn dá dan ya mvéáñ.

13 ¹Ngé ma kóbo míkóbo mí bot ya émí baáɔgel, ve ma kaa ábelé edziɔɔ, ma veɔan ané abeɔá dá duɔ ngé ki nkúú wá sok.

²Ngé me belé nkúlánn medzó, meé yem fe é mam mése má nzaman kén mot, ya nyemann óse, ngé me belé ki mbwínánn óse ná ma vea mikoó, ve ma kaa ábelé edziɔɔ, me sés dzóm enziɔ.

³Ngé ma kap é byém byam bíse, ngé ma kee ki é ñúu dam ná eé dzík, ve ma kaa ábelé edziɔɔ, mée belé abúánn enziɔ.

⁴Edziɲɲ é ne edzíp, edziɲɲ e ne añep, edziɲɲ é sés miñamle; é sés aléránn, é sés ki engún; ⁵dǎá bɔ é mam má vé osoán, dǎá dzéɲ áadeñ émyen, dǎá ñan, dǎá lán ki abé, ⁶dǎá sán ékúkwat été, ve dá sán á bébélá été; ⁷dá dzíbi ásesé, dá bwíni ásesé, dá tɔbɔ ya mebúnn ásesé, dá nzomo ásesé.

⁸Edziɲɲ dǎá mana tám enziɲ; ve ngé nkúlánn medzó ó ne, wá ye dzibi; ngé mikóɔ myá mí né, myá myá ye fe mana; ngé nyemann mam wá ó ne ki, wá wá ye fe dzibi. ⁹Amú ná bía yem oyomm abímm, bía kúlu fe medzó oyomm abímm; ¹⁰ve é tám edí é ne ásesé dá ye sɔ, edí é ne oyomm abímm, dá dá ye dzibi.

¹¹É tám me mbé móɲɲ, me ngá bɔ meé kóɔ ané móɲɲ, me ngá bɔ meé tém ané móɲɲ, me ngá bɔ fe meé fas mam ané móɲɲ; ve é tám me ntɔɔ ñá mot, mam mé móɲɲ mé dzibi yaá. ¹²Amú ná, bí ngén bía yén nkút ya nkút ané bá dága á ngɔɔp été, ve tám te, bía ye yén asú ya asú. Me ngén fe ma yem oyomm abímm, ve tám te, ma ma ye yem amvála ané bé yem yaá ma.

¹³Áwola dí, mbwínánn, ya oyan, ya edziɲɲ, byá laɲan bí léa bíte; ve edí dá daɲ, é ne edziɲɲ.

Nkóbán Mikóɔ

14 ¹Dzénɲán ná míní belé edziɲɲ, ñamlenán fe mam méye á Nsísim, dá daɲ ya mvéáñ ná, míní kúlu medzó. ²Amú ná éñí aa kóɔ éyágán nkóɔ, áá kóɔ ya bot, fáve ya Nzamá; mot enziɲ ñí áá wók ki ñí, fáve ná ñí aa kóɔ é mam má nzaman kén mot á nsísim weñ été; ³Ve éñí ñí aa kúlu medzó, aa kóɔ ya bot á mfá ávé bot nguu, melépgá ya áfoɲ milém. ⁴Éñí aa kóɔ éyágán nkóɔ, aa vé émyen nguu; ve éñí ñí aa kúlu medzó, aa vé ekóánn bebwíni nguu.

⁵Me ne kómo ná mína bésésé míní kóɔ biyágán mikóɔ; ve dá daɲ ya mvéáñ ná, míní kúlu medzó; éde éñí aa kúlu medzó aa daɲ é mot aa kóɔ biyágán mikóɔ, fáve ngé aa kelan myɔ, ná ekóánn bebwíni é ñɔɲ nguu. ⁶Á bɔbédzaɲ, édo é ne ná, ngé ma nzu ébe mína meé kóɔ biyágán mikóɔ, nzá abúánn dá ye mína bɔ été? Fáve ngé ma kóɔ ya mína ya nléránn mam, ya nyemann, ya nkúlánn medzó, ngé ki ya ayágalé.

⁷Atwaa é byém bí andziík bí ne kaa ábelé eniɲ, amvála ané mwann tɔɲ ngé ki mvét, ngé byáá bɔ bíduɲɲ byá selan, nzá amvála bá ye yem ya dɔ edí bá lɔɲ mwann tɔɲ, ngé ki edí mvét? ⁸Éde ngé tɔɲ da vé éduɲɲ dá nzaman, nzá aa ye koman á mfá alúmán? ⁹Amvála te édo fe mína ya nkóɔ, ngé ya anu mína kóɔ bífíá bé ne kaa áyem, nzá amvála bá ye yem edí mína dzó? Amú dá ye fonan amvála ané ngé mína kóɔ ya nyem dzóp.

¹⁰É ne boban tám enziɲ ná mikóɔ mí ne mendzaɲ abwiññ é sí ñí, ovɔɔ enziɲ ye été wá wáá dzéɲ ki ayílíga; ¹¹Ve ngé mǎá yem ayílíga ye éduɲɲ

te, ma ye tɔɔ ané nyín ébe é mot aa kóɔ, ñí aa ye fe tɔɔ ané nnéj á mfá wɔm. ¹²Amvála te édo fe mína míní tɔɔ beñamle mam méye á Nsísim, bíragán ádzéj ná míní belé mɔ ededea abwiññ á mfá ávé ekóánn bebwíni nguu.

¹³Ya amú dzam te, éñí aa kóɔ éyágán nkóɔ, á yaglánán á mfá ye ná á kelan wó. ¹⁴Amú ná ngé ma yaglan éyágán nkóɔ, nsísim wɔm wá yaglan, ve ósímánn wɔm wá wá lígi kaa mfí. ¹⁵Éde á yá? Ma ye yaglan ya nsísim, ma ye fe yaglan ya osímánn; ma ye yee byéa ya nsísim, ma ye fe byɔ áyee ya osímánn. ¹⁶Dá é tɔɔ ná, ngé wa vé abwará ya nsísim, é mot ñí a ne kaa ayágale, nzá amvála mot te a ne dzó ná “Amén” ébe mvéán akíba we? Akála ná áá wók édí wa kóɔ. ¹⁷Amú ná, wa túga fá vé akíba mvéáñ, ve é mot mbɔɔ ñí áá ñɔɔ nguu.

¹⁸Ma vé Nzamá akíba ná, ma kóɔ biyágán mikóɔ álot mína bésesé; ¹⁹ve ekóánn bebwíni été, ma bam yébe ná me kóɔ bifíá bí tán ya ósímánn wɔm, á mfá áyágale fe é bot bevɔɔ, se ná awóm binzuk bifíá á biyágán mikóɔ.

²⁰Á bɔbédzaɔ, míní táa bɔ bóɔj ébe ámvála mína tém, fáve ná bɔgán bóɔj á mfá mbɔann abé, ve ébe ámvála mína tém, bɔgán beñá bot. ²¹Á métsiɔj été, é ne ntsilann ná:

“Ma ye kóɔ ya áyɔɔ dí ébe bot béye mikóɔ mifé
ya ébe menu mefé,
éde atwaa néa báá ye ma béá,
Ntí éñe aa dzó dɔ.”

²²Édo é ne ná, biyágán mikóɔ bí ne ndem, se ákála bebwíni, fáve ákála é bot bé ne kaa bebwíni; ve nkúlánn medzó wá ó ne ákála bebwíni, se ákála é bot bé ne kaa bebwíni.

²³Édo ná, ngé ekóánn bebwíni ése é kóán, bot bése bá bé ɔga kóɔ biyágán mikóɔ, véa bot benziɔ bá bé ñí, ébɔ kaa ayágale ngé ki ébá bé sés bebwíni; nde báá ye dzó ná mína kwan mílém? ²⁴Ve ngé bot bése bá kúlu medzó, véa mot enziɔ ye á sés mbwíni a ñí ngé ki éñí a ne kaa ayágale; éde evuzá deñ dá ye ñí bwaale ósú bésesé, aa ñɔɔ fe nkíkán misaɔ ósú bésesé. ²⁵Éde é mam mé ne ñí nswalann á nlém weñ été, má ye kwíñ éndendaɔ, éde néa éñe eé ku asú ó sí, á ɔga kaɔ Nzamá, eé mem ná, é ne été ná Nzamá a ne énzénzaɔ denan.

Ábɔ mam mése tételé á Ndá Nzamá

²⁶Éde á bɔbédzaɔ, nzá dzam dá yian bɔban? É tám mína kóán, kada mot á nzaá ya dzeá, ngé ki ya ayágale, ngé ki ya édí é léreban yaá ébe éñe, ngé ki ya éyágán nkóɔ, ngé ki ya ákelan nkóɔ. Ásesé á bɔɔge á mfá ávéán nguu. ²⁷Ngé mot enziɔ aa kóɔ éyágán nkóɔ, bé kóɔgé bé beáñ,

ngé abwiññ, bé ne bɔ bé léa; ve kada mot ya éyɔŋ deñ; mot enziŋ ñí á kelagán fe. ²⁸Ve ngé é mot aa kelan a sés, bé tɔbɔgé evóó ékóánn bebwíni été, bé kɔbɔgé fáve á mfá bébyen ya á mfá Nzamá.

²⁹Éde bekúlu medzó, bá bé kɔbɔgé fe bé beañ ngé ki bé léa; é bot bevóó bá béé kíŋ nsaj. ³⁰Ve ngé é mot enziŋ ye ébá bé tɔó ósí, á ñɔŋ nleránn dzam, éñí ósúá á tɔbɔgé evóó. ³¹Amú ná mína bésésé míní ne kúlu medzó, kada mot mbóó ya mbóó, ná bot bése bé ne ñɔŋ ayágalé, bésésé bé ne fe ñɔŋ melépgá. ³²Édo ná, mísísim bekúlu medzó myá bɔ bekúlu medzó mewók; ³³amú ná Nzamá a sés éñí ye á nzamzámánn, fáve éñí ye á mvwaá.

Amvála ané énzénzanɔ bíkóánn bebwíni bíse mitɔpbán mi bot, ³⁴biningá bé sísgé bivóó bíkóánn bebwíni été; amú ná é sés bó ntélán ná bé kɔbɔ, fáve ná bé tɔbɔgé édzwée ásí, amvála ané nkɔó métsiŋ wá wá dzó fe dɔ. ³⁵Éde ngé bá kómo yága dzam, bé síligé beyóm beba bébyen á ndá; amú é ne osoán ná miningá á kɔbɔ ékóánn bebwíni été.

³⁶Ye é ne efíá Nzamá dá sɔ ébe mína? Ngé ki ná, ye éñe é sian yaá ébe mína etámm? ³⁷Ngé mot enziŋ aa tém ná a ne nkúlu medzó, ngé ki ná a ne ya Nsísísim, á túga yem ná é dzam ma tsili mína dí é ne é mvéná Ntí; ³⁸ve ngé mot enziŋ áá kómo dɔ yem, bá báá ye ki ñí áyem.

³⁹Á bɔbédzanɔ, édo é ne ná, ñamlénán ná míní kúlu medzó, míní táa ki kili nkɔbán biyágán mikɔbɔ; ⁴⁰ve bé bɔóge mam mése á nganɔ été ya amvála ané mbamba nkomann a ne.

Áwómó míwúán été

15 ¹Á bɔbédzanɔ, ma lére mína ná, é mbamba fwéñ me kat yaá mína, éñí míní ñɔŋ yaá, éñí míní lajan yaá fe été, ²ébe éñí, míní tɔbɔ yaá fe nkoránn, ngé mína baale efíá me ngá kat mína, ngé é sés ná mínaá bwíni á nzeze.

³Amú ná édí ósúá, maá kee mína édí ébyen ma me ngá ñɔŋ fe, ná Kristo aá wú akála mísémm myea, ámvála é ne Mítsili été; ⁴ná bá dzep ñí, a wómo fe míwúán été é mos léa, ámvála é ne Mítsili été; ⁵ya fe ná aá yéne ébe Pedro; é belan véa, ébe beyága awóm ya bé beañ; ⁶nia véa, aá yéne fe eyɔŋ déa ébe bɔbédzanɔ álot tán mitet mí tán, abwiññ ye été dá é ngén fe é téa, ve abímm enziŋ dá é ntɔó óyó [nwúán]; ⁷é belan véa, aá yéne ébe Jakobo; véa, aá yéne ébe baapostol bése.

⁸Éde ómvúmvúa bésésé, ané éñí á byála ná tám é lot yaá, aá yéne fe ébe ma. ⁹Amú ná énzénzanɔ baapostol ma me ne éñí aa danɔ ya avítsanɔ, máá yian ki ya dɔ ná bé lwée ma ná apostol, akála ná me ngá dzéŋ ekóánn bebwíni Nzamá ásí. ¹⁰Ve akála é mvɔmm Nzamá, me ne é dzóm me né, é mvɔmm deñ te da deé ndzí ki tɔbɔ ébe ma á nzeze, éde dá é tɔó ná ma me bɔ yaá eséññ álot bésésé, afánɔ ná se ma, fáve é mvɔmm Nzamá e ne ébe ma. ¹¹Édo ná, a ne bɔ ma, ngé ki ébó, néa éñe bía kat fwéñ, néa fe mína míní bwíni yaá.

¹²Éde ngé bá kat fwēñ ná Kristo a wómo yaá míwúán été, é ne bɔ á yá ná bot benziŋ béye ébe mína bá dzó ná nwómán miwúán ó sés? ¹³Ve, ngé nwómán miwúán ó sés, atwaa Kristo ñí eé ndzí ki wómo. ¹⁴Éde, ngé Kristo ñí eé ndzí wómo, nkatann fwēñ wea ó ne nzeze ya fe mbwínánn wenan. ¹⁵Éde, bá bé ñɔŋ yaá bía ané mínéneá bēngañiá Nzamá, akála ná bía vé ngañiá ná Nzamá aá wómo Kristo, éñí ñí eé ndzí wómo, ngé dá e ne ná miwúán myáá wómo.

¹⁶Amú ná ngé miwúán myáá wómo, Kristo ñí eé ndzí ki wómo. ¹⁷Édo ná, ngé Kristo eé ndzí wómo, mbwínánn wenan ó sés ya eban; mína míní ngén fe mísémm myenan été. ¹⁸Dá yíli véa ná, é bot bé ntɔɔ óyó [nwúán] ébe Kristo, bá bé mana yaá fe dzáŋ. ¹⁹Éde ébe éniŋ dzí, ngé Kristo éñe bía bí tɔbɔ yaá ya ñí mebúnn etámm, bía bí ne ébá bá daŋ ya engóngɔɔ álot bot bése.

²⁰Ve éndagá, é ne ná, Kristo ñí a wómo yaá míwúán été, é ngap ósúá ye ébá bé ntɔɔ óyó [nwúán]. ²¹Amú ná amvála ané awú é ngá sɔ́ akála mot, édo fe ná, akála mot nwómán miwúán wá ó sɔ́ yaá. ²²Amú ná amvála ané ébe Adán bot bése bá wú, néa fe ébe Kristo bot bése bá ye tɔbɔ ya eniŋ. ²³Ve kada mot ébe étɔɔ dzeñ; Kristo, ngap ósúá; é belan véa, é bot bé ne ébá Kristo ébe áśś weñ; ²⁴éde ómvúm vúá, éyɔŋ aa ye kee Nzamá Éséá edzwée ngómán ye éniŋ ngúrá, ákoan ná, a mana yaá tsam ekán ése, ya nguú edzwée, ya menguu mése. ²⁵Amú dá yian ná á dzwée akekwiñ ané aa ye mana bwíi mínzínzínŋ myeñ míse mébɔ meñ ásí. ²⁶Éde, nzínzínŋ bá ye súgan tsam, éwɔ́ ó ne awú; ²⁷amú ná a bwíi yaá mam mése mébɔ meñ ásí. Ve, éyɔŋ aa dzó ná mam mése mé mbóo ñí ásí, dá lére éndendaŋ ná, dá vea éñí émyen a ngá bwíi mam mése édzwée deñ ásí. ²⁸Éde niané mam mése mé mana yaá tɔbɔ édzwée deñ ásí; véa, Mwán émyen ñí aa ye fe tɔbɔ ásí édzwée éñí a ngá tɔɔ ñí mam mése édzwée deñ ásí; á mfá ye ná ébe dzam ése, Nzamá éñe aa ye bɔ ébe mam mése.

²⁹Ngé é bɔ kaa ábɔ néa, ébá bá duuban akála bewú bá bá ye bɔ á yá? Ngé miwúán myáá ye wómo amvála enziŋ, éde akála dzé bá duuban ya émyɔ? ³⁰Éde, amú dzé ki bía bía niŋ ángónó eniŋ tám áse? ³¹Á bɔbédzaŋ, ma wú kada mos, akála mesán me tɔɔ ya mína ébe Kristo Yesus Ntí wea. ³²Ngé amvála ané mot binam, me ngá yítan bibibiñ Éfeso, nzá abúánn é ne ma été? Ngé miwúán myáá wómo, bí dzáán, bí náán fe, amú ná ookírí bía ye wú. ³³Kaa dukgán mína bébyen: Bembéa mengɔmm má ywíñ bembamba mefúlú ntuk. ³⁴Búlugán ébe é kén denan, dzɔgán mbɔann nsémm; amú ná bot benziŋ bée belé nyemann Nzamá. Ma dzó dɔ́ á mfá osoán wenan.

Miwúán myá ye wómo á yá?

³⁵Ve, mot enziŋ aa ye síli ná: “Miwúán myá ye wómo nzá ámvála? Nzá ámvála ñúu ki myá ye sɔ́ ya dɔ?” ³⁶Á akút mot, é dzóm wa beñ, dáá tɔbɔ ya eniŋ

ngé kaa ná é tára wú. ³⁷É dzóm dá wa beñ, wáá beñ ki do ya é ñúu aa ye byála ya do; fáve ná nsó kaa bikop; a ne bo nsó trigo ngé ki nsó enziñ ofé; ³⁸Ve Nzamá ñí aa vé wó ñúu amvála ané émyen a ngá kómo, éde kada nsó ámvála ñúu deñ. ³⁹Meñúu mése mé sés amvála avós, fáve ná ñúu fós édo é ne éñí bot, éñí fós édo da é ne éñí betsít; éñí fós da éñí anwann; éñí fós da éñí kwaás. ⁴⁰Éde meñúu méye á dzóp mé né, ya meñúu méye á sí; ngúrá dúmá édo é ne édí ye á dzóp, édí dá é ne édí ye á sí, dá afé. ⁴¹Ngúrá dúmá édo é ne édí nlódzóp, é dúmá ngomdan dá afé, é dúmá avós dá édí atéteñ; amú ná otéteñ wá selan ya éwí ovós á mfá dúmá.

⁴²Amvála te fe nwómán miwúán wá ó ne. Bá beñ é ñúu dá bweñ, bé wómo ya éñí é ne kaa ábweñ. ⁴³Bá beñ á mvyen, bé wómo á dúmá été; bá beñ áteák été, bé wómo á nguu; ⁴⁴Bá beñ ya é ñúu mison, bé wómo ya ñúu nsísim. Ngé ñúu mison e ne, ñúu nsísim da e ne fe.

⁴⁵Amvála te fe é ne ntsilann ná: “Adán, é mot ósúa aá tobo mvelann mot ye émo”; Asúgánn Adán ñí á nsísim wá vé eniñ. ⁴⁶Ve se nsísim éwo ó ne ósúa, fáve ná ñúu mison; é belan véa éñí ye á nsísim. ⁴⁷É mot ósúa a ne éñí ye ósí metsó, é mot beañ ñí a ne éñí ye á dzóp. ⁴⁸Amvála ané mot ye ósí metsó a ne, amvála te fe bot béye ósí metsó bé né; amvála ané mot ye á dzóp a ne, amvála te fe bot béye á dzóp bá bé né. ⁴⁹Éde, amvála ané bía bí бага éfonann mot ye ósí metsó, amvála te fe bía ye бага éfonann mot ye á dzóp. ⁵⁰Ve, á bobédzan, ma dzó mína é ddam dí ná, ñúu mison ya mekií bí sés ñon tsígá Édzwée ngómán Nzamá, ngé ki ná édí dá bweñ dá dé sés ki ñon tsígá ébe édí é ne kaa ábweñ.

⁵¹Dággán ná, ma kóbo é ddam dá nzaman kén mot, ná: se bía bésese bía ye tobo óyó [nwúán], ve deá bía bésese bía ye tobo ntsénán, ⁵²mbíí ya mbíí, ané nkáabe dzís ovós, ébe é tón dá súgan; amú ná tón da ye kóbo, véa miwúán myá ye wómo ébe ñúu é ne kaa ábweñ, éde bía bía ye tobo ntsénán. ⁵³Amú dá yian ná é ñúu dá bweñ ñí, eé bwát éñí é ne kaa ábweñ; é ñúu ye áwú ñí, da eé bwát fe éñí é ne kaa áwú. ⁵⁴Ve niané é ñúu dá bweñ ñí dá ye bwát éñí é ne kaa ábweñ; ñúu ye áwú ñí, da eé bwát fe éñí é ne kaa áwú, véa éñe éfíá é ne ntsilann dá ye dzálában, ná:

“Nwúnán ó min yaá awú.

⁵⁵Á Awú, nwúnán we ó ne ó vé?

Á son, mítéñ mywe mí ne ó vé?”

⁵⁶Mitéñ awú mí ne nsémm, é nguu nsémm da e ne atsiñ; ⁵⁷Ve akíba ya Nzamá éñe aa vé bía nwúnán ébe Ntí wea Yesukristo.

⁵⁸Édo é ne ná, á mindzindziñ mí bobédzan, yémñán nguu, kaa áfógan, míní ke mína vém ébe éséñ Ntí eyon ése, míní yem fe ná éséñ denan ébe Ntí é sés á nzeze.

Bá lóm bekrísten avwálá á Yerusalen

16 ¹Éde, á mfá avwálá ébe mítópban mí bot, mína bogan fe amvála me ngá manan bíkóánn bebwíni bíye á Galasia. ²Eyon evós á sóánn,

kada mot ye ébe mína émyen amvála ané á wún yaá, á kánanjé ngúrá mfá, a nii fe wó, ná bé nza kóán avwálá te é tám ma ye sian. ³Niané me sian yaá, é bot mína ye tóp ébó ma ye lóm ya bekálara ná bé ke ya avwálá denan á Yerusalen; ⁴éde ngé dá yian ná ma me ke fe, bá ye ke bíabe bó.

Pablo aa koman ekena

⁵Ma ye nzu ébe mína éyɔɔ me tára yaá lot á Masedonia; amú ná ma yian lot ó weñ. ⁶Éde tám enziɔ ma ye tɔbɔ bíabe mína, ngé ki ná ma ye lot metám mé avép ó weñ, á mfá ye ná míní vwála ma tsíni ekena ósú ébe é vóm ma ye ke. ⁷Amú ná meé lot éndagá mǎá kómo mína yén, akála ná ma kómo tɔbɔ bíabe mína oyomm abóɔɔn tám enziɔ, ngé Ntí aa yébe dɔ. ⁸Ve ma ye tɔbɔ Éfeso akekwiñ á Pentekostés; ⁹amú ná mora mbéñ á yɔɔbe yaá ma, á mfá mbɔann éséññ mvéáñ; afáɔɔbɔ ná ébá bé ne ma á ngamm áyát, bá bé ne fe abwiññ.

¹⁰Ve, ngé Timoteo a sian, bɔgán ñí ná á tɔbɔ kaa ákɔ wɔɔɔn énzénzan denan; amú ná ñí aa bɔ fe éséññ Ntí amvála ané ma. ¹¹Édɔ é ne ná, mot enziɔ a táa ñí byana. Fáve ná, vwálagán ñí á mvwaá été, ná á búlán ébe ma; amú ná ma yana ñí bíabe bɔbéñan.

¹²Á mfá mwadzan Apolos, maá bíra ñí dzaa ná á nzu ébe mína bábe bɔbéñan; ve éé mbé a belé nkómánn amvála enziɔ ná á nzu éndagá, ve aa ye sɔ é tám a ne belé afóo.

Mélépgá má súgan

¹³Mómɔɔn, á téabán fe fáve osúosú á mbwínánn été, ábɔan mam amvála ané befám, áyémán fe nguú. ¹⁴É mam menan mése mé tɔbɔgé mbɔann ya edziɔɔ.

¹⁵Á bɔbédzan, ma lép mína ná: Míní yem yaá ébá béye é ndá bot Estéfnas, ébó bé ne bebwíni béye ósúá Ákaya, bé tɔbɔ yaá fe ná bá belan ya mítópban mí bot. ¹⁶Édɔ ná mína tɔbɔgán fe édzwée amvála bot béte ásí, bábe é bot bése bá bɔ eséññ fufúlu ya ábíra fe bɔ eséññ.

¹⁷Ma sán akála ásɔɔ Estéfnas ya Fortunato ya Akaiko, amú ná ébó bé dzálá yaá édí é ngá dzéɔ ma á mfá wenan. ¹⁸Amú ná bé vé yaá ma nsísim awaabé ya fe áawenan. Yemɔán ñɔɔ amvála bot te.

Mebéránn mefé

¹⁹Bikóánn bebwíni bíye Asia byá bérán ya mína. Akila bá Priska bábe ékóánn bebwíni é ne é ndá dzeba, bá bíra bérán ya mína ébe Ntí.

²⁰Bɔbédzan bése bá bérán ya mína. Ábérán bevɔɔ ya ébá bevɔɔ ya ñánján memáɔɔn bɔbéñafwáa.

²¹Ma Pablo, ábéránn dí dá é ne édí ya é wéá wɔm ya ékaɔɔn dam.

²²Ngé mot enziɔ a ne kaa ádziɔ Ntí, á tɔbɔgé ya bibɔɔ. Á Ntí, nzaá!

²³É mvɔmm Ntí Yesus eé tɔbɔgé ébe mína. ²⁴Édziɔɔn dam ébe Kristo Yesus dá é tɔbɔgé fe ébe mína bésesé.